

**EXEQUIAE, DAS IST:  
PREDIGT BEY DEM  
BEGENGNUS DER ...  
FÜRSTIN UND FRAWEN  
... ELISABETH...**

---

Martin Oberndorffer



Der LXI. Betpsalm / für die  
Oberkeit.

**S**ie Gott mein geschrey / vnd mercke auff mein  
Gebet.

Wie niden auff Erden ruff ich zu dir / wenn  
mein Herz in angst ist / du woltest mich führen auff  
ein hohen Felsen.

Denn du bist mein Zuversicht, ein starker Thurm  
für meinen Feinden.


Ich wil wohnen in deiner Hütten ewiglich/ vnd  
trawen vnder deinen Fittigen/ Sela.

Denn du GOTT hörest meingelübt de / du bes  
lohnest die wol / die deinen Namen fürchten.

Du gibst einem Könige langes leben / daß seine  
Zar wehren immer für und für.

Das er immer sitzen bleibt vor **GOTT**, Erzeu-  
ge im güte vnd treue/die in behüten.

So wil ich deinem Namen lobsingn ewigklich,  
das ich meine Gelübde bezale täglich.



Dem Durchleuchtig-  
sten Hochgebornen Fürsten vñnd  
Herrn / Herrn Ludwigen Pfaltzgraffen bey  
Rhein / des heiligen Römischen Reichs  
Erzdruck / sassen vñnd Churfürsten /  
Herzogen in Bayern / c. Mei-  
nem gnedigsten  
Herrn.



Durchleuchtig-

tigster / Hochgeborner  
Churfürst / Gnedigster  
Herr. Vñnd diese zelt  
pflaget man inn der  
Kirchen Gottes allen  
betrübten Christen / so  
in dieser Beishanta we-

Joan. 11.

bern / fürzulesen / die schöne Historia von dem tödt-  
lichen abgang / vñnd herlichen aufferweckung La-  
zari / darinne / vñnder andern gar trösslischen Sprü-  
chen / vermeldet wird / wie der Herr Christus er-  
grimmet sey im geist / vñnd habe sich sehr betrübet /  
vber den todt seines lieben Freundes Lazari.

Solch grimmen vñnd betrübnuß ist ein heilliger  
A ij enser

eyßer gewesen/mit lieb vnd leid / zorn/vnd rach ver-  
menget/ohne sünd vnd vnordnung / vñnd an ihnu  
selbsten mit worten nicht zuerlöschē.

Die Historien rhümen Georgen Castriot/  
sonst Scanderbeg genandt/für einen dapffern vñ  
fraidigen Kriegshelden / dann so offte derselbe in  
die Türcken / die ihn auß seinem Erblande vertrie-  
ben/hat fallen wollen/ist ihme das hertz auß einem  
Helden zorn entbrandt/vnd das geblüt hat in ihme  
also gewallet/das es ihme durch die leßzen her auß  
getrungen / vñnd hat mit seiner eignen hand ober  
2000. Türcken erschlagen.

Jud. 15. Simson ergrimmet auch ober seine/vnd seines  
Volcks feinde/& mixta est infania luctu, vñnd in sol-  
chem grimm ergreiffet er einen alten Eselskinbacken/  
erschlecht damit 1000. Philister.

1. Reg. 18. Elias entbrandte auch in solchem Göttlichen  
zorn/da er den Baaliten vnder augen ruckte/vnd  
nach dem wunder/das Gott an seinem opffer thete/  
die abgöttischen Psaffen alle erwürgete.

Das ist aber alles mit vnsero Herrn Christi  
brennenden vnd Göttlichen eyßer nicht zuerglei-  
chen/Dann er ist ein Held ober alle Helden / Gote  
Ebr. 7. vnd mensch von Natur/gerecht/ heilig/vnbesleckt/  
von



von allen sündern abgesündert / vñnd höher dann  
der Himel. Darumb so groß dise person ist / so groß  
ist auch sein zorn / do er die keuffer vñnd verkeuffer <sup>Johan. 2/</sup>  
auß dem Tempel treibet / vñnd wider Todt vñ Teuf. <sup>Joha. 11/</sup>  
fel bey Lazari grab ergrimmet.

Dann daselbst kommen in seinem hertzen zu-  
samen / lieb vñ trew / nicht allein gegen seinen Wir-  
tinen / sondern gegen allen betrübten elenden Chri-  
stien / vñnd leid vñnd schmerzen / vber dem grossen ja-  
mer des ganzen menschlichen geschlechts / welchs  
seine edleste vñnd liebste Creatur ist / vñnd zorn / vñnd  
rach vber den Teuffel / der durch die Sünde den  
Todt / vñnd alle noth in die Welt gebracht / vñnd wi-  
der den Todt selbst / der im seine liebste Freundin  
von anbegiu erwürget hat / vñnd diese wunderbare  
Mixtur ist in Christi hertzen ordentlich vñnd heilig /  
do sönsten in andern grossen vñnd heiligen Leuthen  
viel vnordnung mit vnderleuffet.

In solchem eyser schmilzet dem HERN das  
hertz für lieb vñnd leid / grun vñnd rach / das ihm das  
wasser durch die augen tringet / vñnd vber sein heill-  
ges angesicht rinnet.

Vñnd zeucht also der Heri Christus / in solchen  
zornigen gedanken / seinem feinde dem Teuffel /  
vñnd seinem hellischen Reich vñnder augen / vñnd heist

den todten kercker/darinn der Todt Lazarum ver-  
sperrt hielt/er öffnen / vnd wie der Löwe seine halb  
todte jungen mit seinem prüllen sol erquickten / also  
schreyet der Löw von stam Juda / Lazare kom  
heraus.

In dem augenblick erhebt sich der Todte man/  
der schon 4. tage im grab gelegen/ vnd anbrüchig/  
vnd kommet hersfür mit verhüllten angesicht/ vnd  
gebundenen henden vnd füßen.

Ob nun wol dieser Lazarus dissmaln zum zeit-  
lichen leben erwecket / vnd ist hernach wider gestor-  
ben/da er zuuor/nach des Herrn Christi himelfart/  
das Euangelion zu Marsilien in Franckreich ge-  
pflantzet/vnd hat doselbst eine Kirche gebawet / so  
ist doch diese erweckung ein gewiß zeugnus der  
aufferstehung vnseres fleisches / dauon der HErr  
Johan. 5. Christus prediget : Es kömet die stunde/in welcher  
alle die in gräbern sind / werden meine Stimme hö-  
ren/vnd werden hersfür gehen / die gutes / das ist/  
wahre buß/gethan haben / zur aufferstehung des  
lebens / die aber böses gethan / zur aufferstehung  
des gerichtes.

Auß dieser wunder schönen Historien/ die vns  
zum trost auffgeschrieben / sollen wir vor allen dun-  
gen auff den helden Jesum Christum/vund seinen  
heili-

heiligen eyser sehen / vnd beydes person vnnnd affect  
wol kennen lernen. O wie ein treuherzigen Ho-  
henprieſter / vnd barmherzigen / leutseligen lieben  
Jeſum / das iſt Heyland / haben wir an dieſem rech-  
ten Simſon / der verſucht iſt allenthalben / gleich  
wie wir / doch one ſünd / vnnnd kan mitleiden haben  
mit vnſer ſchwachheit / vnnnd gehet ihm vnſer elend  
vnd trübsal zu hertzen / vnd thut ihm weecher dann  
vns ſelbſten / vnd ergrimmet noch zur rechten Got-  
tes wider Teuffel vnnnd Todt / die ihm den grösſten  
ſchaden thun an ſeiner lieben Seele / welche iſt die  
Chriſtenheit / vnd wartet auff den beſtimmten tag /  
da er ſich wider an allen ſeinen Feinden ewig re-  
chen / vnd dieſelben vnder ſeine vnd ſeiner Glaub-  
gen füſſe legen wird.

Dann das iſt je gewiß / das ſchön ein ſündlein  
verordnet vnd herzu nahet / darinder Todt alie / die  
er hie erwürgt vnd verſchlungen / wider von ſich  
ſol vnd muß geben / wie Jonam / vnd darauff ſelbſt  
widerumb mit allen ſeinem todten gerethe ewiglich Eſa. 25.  
verſchlungen werden / do werden vnſere Todten / ſo 1. Cor. 15.  
wir vor vns im Herrn hingerandt / mit ſewernew-  
en / herlichen / freſſtigen / vnſterblichen / vnuerweß-  
lichen vnd geiſtlichen leiben erſcheinen / vnd vor dem  
angeſicht der heilige Dreyeinigkeit in ſolcher won-  
ne ewiglich leben / die kein aug geſehen / kein ohr ge- 1. Cor. 2.  
hört / kein menſchlich hertz gefühlet hat. Dañ wird  
A iiii erful

1. Cor. 15. erfüllet werden / das geschrieben steht: Der Todt  
ist verschlungen in dem sieg / das leben triumphiret  
Dse. 13. vnd spricht: hie gewonnen / Todt wo ist dein stachel  
Hell wo ist dein sieg

Neben dem sollen wir auch der almechtigen  
krafft des worts. Ihesu Christi in diesem wunder  
wahr nemen / denn gleich wie Simson kein ander  
waffen wider seine Feinde brauchet / dan allein den  
Jud. 15. Eselskinbacken / also führet der Herr Christus wi-  
der seine feinde / sein gewaltig Wort vnd Stimme.  
Das ist der rechte Kinback des Jüdischen Esels/  
welchen Gott mit Gesetz vnd zucht beladen / vnd  
die soupflanzung seines worts vnd verheissung  
beuohlen hatte.

Auß diesem Eselskinbacken / das ist / auß der Ju-  
dischen Synagog vnd Prophetischen Schuel ist  
ein Heilbrunnen entsprungen / die Christliche Kirch  
im neuen Testament / welche der Herr Christus  
selbst / sampt seinen Aposteln vnd Lehrern / biß ans  
ende der Welt / durch das wort vnd den geist seines  
mundes samlet. Dis wort ist eine Göttliche krafft /  
Rom. 1. die da selig macht alle / so daran glauben / Auß dem  
2. Cor. 10. wort steht vnser Christenthumb / die Waffen vnser  
Ritterschafft / mechtig für Gott / zuuerstören die Fe-  
stungen vnd anschlege / vnd alle höhen / die sich er-  
heben wider die erkantnuß Gottes / vnd gefangen  
zu ne-



zu nemen alle vernunft vnder den gehorsam Christi. Auff dem wort stehet vnser Glaube/Gerechtigkeit/Hoffnung/Freudigkeit/sampt dem ewigen leben. Tolle verbum & sustulisti omnia: Wer sich an das Wort mit glaubiger zuuersicht helt / vnd sich darein flüchtet vnd schlinget / der hat das ewige leben/vnd wird keines Todtes gewar werden/ Sondern/wie ein müdes Kindlein/sein sanfft in dem Wort einschlaffen / vnd in krafft des Worts widerumb auß seinem Grabe gehen.

Weil dann/Gnedigster Churfürst vnd Herr/ der liebe Gott/nach seinem gnedigen willen / dem wir allezeit sollen ehren / dem zeitlichen Tode / als der Sünden sold/auch ober E. Churfürstliche G. herzliebste Gemahlin/seligster gedechtnuß/vorhengeget hat/ Vnd aber ire Churfürstliche Gnaden/bey dero lebzeiten / den Herrn Jesum Christum recht erkandt/vnd trewlich gedienet/sein Wort für ihren höchsten schatz gehalten / vnnnd alle lust vnd freude daran gehabt/vnd darauff so seuberlich vnd sanfft viel mehr eingeschlaffen/dann verschieden ist / mit solcher Christlicher Bekandtnuß/Glauben / vnnnd Vernunft / das wir Gott billich dafür zu danken / vnnnd täglichen vmb eine solche Euthanasian, das ist/seligen abschied zu bitten haben. So wird euer Churfürstliche Gnaden/als ein Gottmächtiger Helde/sich nun mehr zu ruhe geben/vnd der trawrigkeit

B

rigkeit nicht nachhengen. Sondern dero leibs leben hie auff Erden / in krafft des heiligen Geistes / dem löblichen Hause der Pfaltz / vns armen Vnderthonen / vnd der ganken betrübten Christenheit noch ein lange zeit vorsparn / vnd nicht selbst vrsach zu grösserm rieß vnd schaden geben.

1. Pet. 4.

Psal. 4.

Unser Gott hebt sein Gericht von seinem Hause an / vnd züchtiget nur seine liebe Söhne / vnd füret sie wunderbarlichen vnderm Creutz / damit er durch dasselb / als durch eine herbe vnd bittere artzenen / den innerlichen netwen Menschen in vns reinige vnd heilige von einer krafft vnd klarheit in die ander / vnd beraite in zur ewigen seligkeit / vnd vordleynde vns diß sündige leben / wie sein eigener Sohn hat durch sein Creutz vnd Leiden in sein herligkeit müssen eingehen.

Diesen guten rath Gottes sollen wir vns gefallen lassen / ja anbeten / welcher seiner art nach / so oft er etwas grosses / das kein Mensch hoffen döfft / für hat / machet er zuuor durch das liebe Creutz alles zu nicht / vnd thut diß darumb / das er vns züchtige / vnd vnsern Glauben erwecke / vñ von den Visibilibus, daran der alte Adam hengt / ad inuisibilia wende / Dañ was sichtbar ist / das ist zeitlich / was aber unsichtbar / das ist ewig / damit also vnser Glaub auff hoffnung gleube / da nicht zu hoffen ist: Nicht weniger wil er unsere lieb gegen im auffblasen /

sen/vnd eine grosse biunß darauß machen / wañ er  
seine beste gaben/die wir lieb vnd werth haben/von  
vns hinweg nimmet / vnd also die Consolationes re-  
rum praesentium enzeucht/auff das der schufft trost/  
raum vnd zuthun bey vns finde/wie E. Ghurf. G.  
jehund dero liebsten schatz auff Erden vorzücht hat/  
auff dz er an dero stat E. Ghurf. G. sich desto mehr  
trew vnd gutes zu dem lieben Gott versehen sol.

So ist er from vnd trew/vnd leget den seinigen 1. Cor. 10.  
nicht mehr auff/dann sie ertragen können/sondern  
wañ wir den Kelch des Creutzes mit gehorsam an-  
nehmen/vnd in gedult darauß lippern/ so gibt er alle  
tag vnd stund an trost vñ krafft zu / das vns alles/  
so vns sonst vnmüglich sein deuchteet/mit seiner hülff  
ertragen können. Si visum est addere doloribus, ad-  
dit & patientiae & gratiae dono, damit wir vnderm  
Creutz erhalten / ihn vmb alle seine gute loben vnd  
priesen können.

Er leñet sein gemechte am besten/vñ er zeiget sich  
derhalbē wie der rechte Samariter/wañ er Wein Psal. 103.  
in vnserē wundē geußt/vñ das sündige Fleisch auß-  
beisset/vñ darnach von seinem himlischen trewden  
öl darein treußet/damit er vnserē wunderē heyle.

Darumb tröste sich E. Ghurf. G. selbst nach dero  
hohen erkenntnuß/durch welche E. Ghurf. G. reich-  
lich gegeben ist/den willen Gottes/ vñ die werck sei-  
ner hende/die wunderbarlich / vnd der Welt unbes-  
tandt sind/zuerkennen.

E. Ghurf.

Job. 14.  
Ysa. 39.  
Esa. 56.

Erwer Thurfürßliche Gnaden haben den lauff  
aller Welt für augen/der heist: Serius aut citius se-  
dem properamus ad vnam. Vnd einem jeden ist sein  
Stündlein schon bestimmet / So raffet Gott ge-  
meiniglich die Frommen hinweg / vñnd samlet sie  
auff / für dem vnglück / vñd ihr leiblicher tod ist ein  
ende alles todtes / jammers vñd elends / das vns noch  
auff dem halse liget / vñd ein eingang zum ewigen  
leben. Die Beinlein vñd Steublein aber unserer  
entschlaffenen / bewahret Gott in seinen henden / vñ  
wil darauff einẽ schönẽ / durchsichtigen / hellen leib  
erbauen / vñd vns mit Leib vñ Seele wider zu den  
vnsern / dero wir hie entrathen müssen / in vnauß-  
sprechlicher ehre vñd freude bringen / vñd in ewiger  
bekandnuß vñd gemeinschafft bey einander vñge-  
schieden erhalten.

Do wir nun hierüber ein kleine zeit der vnsern  
Freundschaft / trost / rath / vñnd hülff müssen ent-  
peren / So wil Gott dero statt vertreten / vñd die  
entzogene freud / so wir an den Sichtbaren gehabt /  
reichlich erstaten.

Vñd das ich mit dem anfang dieser Schrifften  
beschlicße / So lebet vnser Hoherpriester Ihesus  
Chrlsus / noch zur rechten Gottes / vñd ist bey vns /  
vñd wohnet vñd wirket in vns / vñd hat herrlich  
mit vns / vñd was vns wehe thut / das  
fület



fület er auch / vnd wird bald widerkommen / vnd  
dem Tode begegnen / vnd sich an ihm redlich re- Esa. 25.  
chen / alle thienen von vnsern augen abwischen / Apo. 7.  
vnd vns wider zustellen / was vns der Todt hie ab-  
gezwaht / viel schöner vnd herrlicher / dann wirs hie  
gehabt.

E. Churfürst. G. herkhlichste Gemahlin / hat  
das ende ihres Glaubens schön erraicht / da für ihre  
Churfürstliche Gnaden nicht die ganze Welt ne-  
me / Sie hat ihren lauff vnd kampfß verrichtet / vnd  
wartet in der ewigen ruhe der Ehren fron / die der  
Herz Ihesus Christus wird / hiez Churfürstlichen  
Gnaden auffsetzen vor allen außersölten. Vns  
aber ist (leyder) wehe durch diesen Rieß geschehen /  
weil zumal dergleichen mehr nach einander an  
frommen vnd heiligen Leuthen sich begeben / vnd  
haben derowegen gnugsam vrsach zu trawren.  
Damit wir nun vnser herkhliche vnd mitleidige  
trawrigkeit vnd sorg öffentlich bezeugeten : So ha-  
ben E. Churfürstliche Gnaden Gottseligster Ge-  
mahlin / zu schuldiger danckbarkeit / vnd E. Churf.  
Gnaden selbst zu vnderthenigsten gehorsam / auch  
Gott zu ehren vñ gefallen / vnserer Kirch zu rhum /  
vnd nach dem Exempel aller Christlichen Gemein-  
den / wir E. Churf. Gnaden Gemahlin / Christ-  
seligster gedechtnus / allhie zu Amberg auch ein  
Publicum luctum, das ist / gemeine Glagzeit / vnd  
B. iij Churf.

Chriſtliche Exequias gehalten/wie ſich nach Gottes Wort/vnd Chriſtlicher guter weye gebüret.

Vnd nach dem mir auffgetragen worden die Leichpredig zuthun / hab ich dieſelb nicht hinderhalten/ſondern in Druck geben / vnd in abweſen vnſers Druckers allhier / zu Regenspurg fertigen laſſen wollen / Wolte Gott/sie dermaſſen geſtellet wer/das nur E. Churf. G. daran gnedigſt gefallen haben möchte. Was aber am Werck abgehet/wollen E. Churf. G. meinem vnderthentigſten Chriſtlichen Willen zumeſſen / vnd dieſe einſeltige Leichpredigt in allē gnaden vermercken/ vñ auffnehmen.

Wir wollen mit ernſt beten/das der Gott alles troſtes E. Churf. G. durch ſeinen geiſt ſelbſt tröſte/ vnd ſtercke/biß erſcheine das werck / darauff er vns in trübsal heiſſet hoffen/ daß er je nicht von herten die Menſchen plaget/vnd betrübet / vnd iſt ſo gut/wie Athanaſius ſagt/ Das er nichts böſes geſchehen laſſe/wann er nicht etwas gutes darauß ſchaffen köndte. Seine Barmherzigkeit hat kein ende/ ſondern wird alle morgen neu / vnd ſeine trewe iſt groß. Der Herz iſt mein theil/ſpricht meine Seele/ darumb wil ich auff ihn hoffen / dann der Herz iſt freundlich / deme der auff in hoffet/vnd der Seele/ die nach im fraget. Es iſt ein köſtlich ding gedultig ſein/vnd auff die hülffe des Herrn hoffen/ dann der

Herr

Herz verstoßet nicht ewigklich/ Sondern et betrü-  
bet wol/vnd erbarmet sich wider / nach seiner gros. Eph. 3.  
sen güte/vnd kan vberschwenglich thun/vber alles  
das wir bitten oder verstehen. Der Herz sorget für  
vns / vnd kan viel mehr vnd größers geben / dann  
vnser Herz zu bitten / vnd zu begeren vermag. Er  
wil es aber nicht ehe thun/ er habe dann zuuor weg  
genommen / das wir nach vnsern düncken / ohne  
schaden vnd gefahr nicht entperen können.


Vnser höchster Tröster Jesus Christus/der E.  
Churf. B. Gemahlin auch herzhlich liebet/vnd hat  
irer Churf. B. durch sein Wort in sein Reich be-  
ruffen/vnd nun/von E. Churf. B. genommen/vñ  
zu sich gefordert / Der tröste / stercke/vnnd erhalte  
E. Churf. B. biß auff den tag/da dieselb iren herzh-  
lichsten schatz / in ewiger freude vnnd wonne sehen  
werden / wann nun der rechte Oftertag wird her-  
ein brechen/Amen. Datum Amberg in E. Churf.  
B. Churstadt/den 14. Aprilis, Anno 1582.

E. Churf. B.

Vnderthenigster

Gehorsambster

Martin Oberndorffer.







# Gliebten inn

dem Herrn. Nach dem vnser lieber Gott/ nach seinem rath vnnnd willen/ den wir vns allezeit sollen gefallen lassen/vnd anbeten/ wegen vnser grossen vndanckbarkeit vnd bößheit/ die Durchleuchtigste / Hochgeborne Fürstin vnd Fraw/ Fraw Elisabeth Pfalzgräfin bey Rhein/ Herzogin in Bayern/ geborne Landgräfin zu Hessen/ıc. Des Durchleuchtigsten/ Hochgebornen Fürsten vnnnd Herrn/ Herrn Ludwigen Pfalzgraffen bey Rhein/ des heiligen Römischen Reichs Erzdrukßassen vnd Churfürsten/ Herzogin in Bayern/ıc. vnser gnedigsten Herrn hergliebste Gemahlin/ vnser auch gnedigste Churfürstin vnd Fraw/ hochlöblichster vnd Christeligster gedechtnuß/den 14. Martij dieses 82. Jars zwischen 10. vnd 11. vhr/vor Mittag/von disem Jamerthal/durch ein sanfftes stündlein abgesetzt/vnd nach langwiriger schwachheit/zur seligen ruhe gebracht/ eben zu der zeit/ da wir sonderlich viel frommer vnnnd heiliger Leuth bedörffen/durch welcher Gebet/ rath vn̄ hülff wir getröstet/vn̄ erquicket werden solten. So haben wir nicht allein vsachen genueg/ sondern

dern auch Befehl vnd Exempel auß heiliger  
Schrift/ob diesem vnuersehenen Rieß hertz-  
lich zu trawien.

Dann Syrach befehlet am 38. Capittel:  
Wir sollen vnser Abgeschiedene beweinen vñ  
klagen/als were vns groß leid geschehen/ vnd  
sollen bitterlich weinen/vnd hertzlich betrübet  
sein/vnd leid tragen/darnach die abgeforder-  
te Person gewesen ist. Vnd im newen Testa-  
Rom. 12. ment heisset vns S. Paulus auch weinen mit  
den weinenden. So hat man vor alters auch  
gemeine Klagen / vnd öffentliche Trawerzeit  
gehalten/wie das ganze Land Juda leid ge-  
tragen / vmb ihren lieben König vnd Landes  
Vater Josiam / vnd der Prophet Jeremias  
hat selbst eine Leichtpredigt gethon / vñnd  
die Egypter haben ein gemein trawien 70.  
tag lang gehalten / vber dem Erzuatter Ja-  
cob. Vnd der Herz Christus selbst hat heiß ge-  
weinet vber seinem Freund Lazaro.

Derohalben wollen wir für vns nemen/  
den schönen Spruch / welchen vns der heilige  
Geist in 56. Capittel des Propheten Esaie hat  
fürgeschrieben/das wir darauff lernen sollen/  
Das nach Gottes Wort kein grösser Schatz  
auff Erden ist / dann eine fromme Gottselige  
Obzigkeit : Vñnd das nach solcher Obzigkeit  
ab=

abschied grosse Landstrassen vber die Gottlo-  
sen / vnd Unbußfertigen pflegen zu ergehen.  
Vnd wie fromme vnd Christliche Vndertha-  
nen in solchen fällen ihre gemeine Klage nach  
Gottes Wort sollen anstellen vnd halten.

Der Spruch lautet also.

**D**ER Gerechte kommt vmb / vnd nie-  
mand ist / der es zu hertzen neme / vnd  
heilige Leuthe werden auffgerasset / vnd nie-  
mand achtet darauff / dann die Gerechten  
werden wegtgerasset für dem vnglück / vnd  
die richtig für sich gewandelt haben / kömen  
zum friede / vnd ruhen in iren Kamern.

Diesen Spruch lasset ewere Kindlein auf-  
sen lernen / vnd daheim für Tisch sagen vnd  
widerholen / den er kan vns allerley erinnern  
vnd kressftig trösten.

Vor allen dingen aber sehet auff den Spre-  
cher / der diesen Spruch hat außgesprochen/  
welcher ist der warhafftige / vnd almechtige  
Sohne Gottes / der Mund vnd Redner der  
heiligen Dreyeinigkeit / dessen Wort der heili-  
ge Geist in den Propheten vnd Aposteln gesü-  
ret vnd erkläret.

Weil nun der Sprecher so groß ist / vnd  
größer dann Himel vñ Erden/ So muß auch  
sein Spruch heilig vnd höher/vñ Emuna Amen,  
das ist/gewiß vnd warhafftig sein.

Wann sonst grosse Herzen ein schön Wort  
reden/so pflegt mans nachzusagen/ vnd auff=  
zuschreiben. Nun redet hie Dominus Dominantis  
um & Rex Regum,das ist: Der Herz aller Herrn/  
vnd König aller Könige/ auff des mund vns  
Gott der Vater vom Himel weyset / der selb  
spricht ein wort / das auß seines ewigen Vat=  
tern hertzen gequollen / vnd im rath der heili=  
gen Dreyeinigkeit beschlossen vñ ratificirt ist/  
darin nennet er die Gottgläubigen Zaddikin/  
vnd Chasiddin / das ist / gerechte/vnd heilige  
Leuthe / weil sie mit dem Rock der gerechtig=  
keit/welchen vns Ihesus Christus durch seine  
gehorsam gewircket / vnd mit seinem blut ge=  
ferbet/vnd in der Tauff angezogen/bekleidet/  
vnd mit dem heiligen Geist versiegelt sein/vnd  
wandlen richtig im Glauben / vnd guten Ge=  
wissen.

Ob nun wol diß ganze Capittel gute vnd  
böse Lehrer vnderscheidet / vnd im ermeltem  
Spruch eigentlich rechtschaffene Prediger be=  
schreibet / wie der Text sein gibet / welche den  
Frieden verkündigen/nemlich/vergebung der  
Sün=



Sünden: So ist doch hiemit die glaubige Ver-  
brigkeit Mann vnd Weib auch gemeinet / als  
der fürnembste theil der Christlichen Kirchen/  
welche die heilige Schrift nicht allein Stabili-  
menta, das ist / pfeyler / seulen / vnd grundueste  
des Landes / sondern auch nutricos & nutrices Ec-  
clesiæ & piorum doctorum, das ist / Pfleger vnd  
Sengammen / der Kirchen Gottes vnd dero  
Diener / nennet / vnd Moyses gibt ihnen das  
Gesetzbuch / nemblich die heilige Bibel auch in  
die hend / das sie darin ihr lebenlang lesen / den  
Herrn fürchten / vnd nach den worten seiner  
Rechte thun sollen / vnd danon nicht weichen /  
weder zur rechten noch zur lincken / Daher  
sind David vñ Salomon nicht allein Regen-  
ten / sondern auch Propheten / vnd Prediger  
gewesen / wie der löbliche Fürst Georg von  
Anhalt / Christseliger gedechtnuß / auch selbst  
geprediget hat / Vñ der König Josias ließ sei-  
nen Vnderthonen im Tempel zu Jerusalem  
das Buch des Bundes / welches eine zeitlang  
verlohrn / vnd domals wider funden worden /  
verlesen / vnd erklären / vnd thet alle greuel im  
Lande weg / vnd schaffete / das ganz Israel de  
Herrn nach gedachtem Buch dienen solte. Das  
Buch der Richter / rühmet am 4. Capittel die  
Debora Lapidots Eheweib: Dise war eine Rich-  
terin in Israel / sprach recht / bestellte Kriegs-  
leuth wider des Landes Feinde / vnd tröstet

darneben das heer des Herrn / als ein rechte  
Feldpredigerin.

Dann ob wol das Regiment der Mann-  
schafft gebüret / so hat doch Gott wunderbar-  
licher weiß / viel gutes in Kirchen vnd Polli-  
ceyen / auch durch Gottselige vnd vernünfft-  
tige Frawen außgericht / Wie die Jael dem  
Sissera ein Nagel durch sein Haupt schlug /  
vnd die Fraw auff den Thurn Thebez den  
Feind mit einem stuck vom Mühlstein zu todt  
warff. Gott kan predigen / rathen / vnd helfen  
durch Mann vnd Weib / wann es die noth vñ  
seine Ehre erfordert / vnd Ehr Hertz vnd  
muth / glück vnd heil außtheilet / vnd wunder  
thun wil.

Darumb so gehöret die liebe Obrigkeit /  
Mann vnd Weib / auch in disem Spruch / vn-  
der die Zadickim vnd Chasiddim / die in Chri-  
sti Blut getauffet / vnd mit dem heiligen Geist  
verpfendet sein / vnd haben ihre lust am Gesetz  
des Herrn / das sie darnach thun / vnd leisten  
frommen vnd trewen Predigern / welche sonst  
in der Welt wol geplaget / trost vnd schutz /  
nicht als Herrn vnd Meister vber das Pre-  
digamt / das sie nicht gestiftet / vnd weniger  
recht daran haben / als der Teuffel am Himel-  
reich / wie Doctor Luther redet: Sondern als  
Pfleghäter vnd Sengammen.

Was

Was nun solche gerechte/ heilige/ trewe  
vnd barmherzige Obrißkeit für ein schatz vnd  
gabe Gottes ist / welche Vnderthonen erken=  
nen/ vnd vber Gelt vnd Silber lieb haben sol=  
len / das bericht vns auch die Schrifft durch  
zeugnuß vnd exempel.

Dann es ist vnnd bleibt doch das alte  
Sprichwort war / vnnd kommet mit Gottes  
Wort vnd vernünfftiger Heiden schrifft vber=  
ein/ das kein vnderchied ist / vnder einen fro=  
men Fürsten/ vnd trewen Haußuater.

Dann wie ein frommer Haußuater sein ey=  
gen Hauß herzlich meinet/ vnd tag vnd nacht  
für sein Weib/ Kind / vnnd Gesind/ betet vnd  
sorget/ ehe dann sie auch daran gedencen/ da=  
mit sie in aller Gottseligkeit erzogen / mit hüß  
vnd füß versehen / in ruhe vnd fried für bösen  
Leuthen bleiben/ zu ehren kommen / vnnd nach  
seinem abschied / Gott vnd Leuthen wol dies=  
nen mögen.

Vnd ob sie nicht allezeit ime darfür dan=  
cken/ ja oft mit vngehorsam/ vnd widerpen=  
stigkeit erzürnen / so leß er doch sein Vater=  
herz nit fahren/ noch die vndanckbarkeit/ seine  
väterliche trewe vberweltigen / wie man im  
König Dauid sihet / der seinen abtrünnigen  
vnnd Rebblischen Sohn Absolon so kläglich  
beweinet/ vñ hette in vber sein vilfeltig grew=  
lich verbrechen / gern wider zu gnaden ange=  
nommen.

Also

Also ist auch ein frommer Landes Vater  
oder Landes mütter/so Tag vnd Nacht beten  
oder sorgen/für ire Land vnd Lenth/damit sie  
mit reiner Göttlicher Lehre / an ihrer Seelen  
ewiglich / vnd hie zeitlich an Leib vnnnd Gut  
versorget/bey irem Recht erhalten / vor Un=  
recht vnd Frenel beschützet werden / vnd sich  
ruhlich mit dem iren nehren / vnd ein stillen le=  
ben führen mögen. Eine solche Obrigkeit ist  
wie ein lieblicher Tau / vnd fruchtbarer Re=  
gen/der die dürre Erde befeuchtet/ vnd erfris=  
chet die schwachtigen Kreutlein. Wann zu=  
mal solche himilische Tawtröpflein vom Berg  
Sion auff den Berg Moria fallen / vnd seu=  
gen vnd nehren/ trösten vnd schützen die arme  
Chriſtenheit.

Ja solche Obrigkeit/ist wie ein gesundes  
Haupt / welches dem ganzen Leib / vnd allen  
seinen Gliedern Krafft/Sinne / Leben/vnnnd  
Bewegungen mittheilet / Daher nennet die  
Schrift solche Regenten Götter/vnd Engel/  
oder Gesandte Gottes/ vnd Pastores populorum,  
das ist/Volckhirtē. Wie auch vnser Herr Ihe=  
sus Christus ein Herzog in Israel/vñ ein Hirt  
genennet wird/der sein Volck weyden vnd re=  
girn solle / mit seinem Wort vñ heiligen Geist/  
vnd in des heiligen Erzuaters Jacobs Te=  
stament / propheceyēt der heilige Geist / das  
auß



auff Ephraim sollen Hirten vnnnd Ed̄steine/  
das ist / Fürsten vnd grosse Könige kommen/  
wie der Herz Christus den König David Pas-  
storem populi, das ist / ein Vold̄ hirten nennet.

Der alte Heyde Homerns nennet seiner  
zeit Könige auch Pastores populorum, vnd Key-  
ser Tiberius schreibet an seinem Ambtmann:  
Boni pastoris est tondere pecus, non deglubere, das ist:  
Ein fromer Hirt / nimbt von seinen Schafen  
Woll vnd Milch / aber Haut vñ Haar / zeucht  
er ihnen nicht gar ab.

Das sind nun Götter / Engel / vnd Hirten /  
welchen Gott selbst Land vnd Leuth befihlet /  
das sie Fried vnd Gerechtigkeit neben erbar-  
er zucht erhalten / den Feinden auss̄er des Lan-  
des / vnd den auffhürern im Lande wehren /  
vnd der Christlichen Kirchen dienen sollē / da-  
mit man in guter ruhe eheliche narung treib-  
en / Kinder auffziehen / vnd Gottes Wort  
predigen / vnd hören könne / vnd also gute vnd  
trewe einander begegnen / vnd friede / heil / vñ  
gerechtigkeit mit einander blühen vnd wach-  
sen. O wie selig ist das Landt / deme Gott ein  
solchen thewren schatz bescheret / wie Moyses /  
Joseph / Dauid / Josias / Josaphat / Dantel im  
alten Testament / vnd vnder den Christlichen  
Monarchē / Cyrus / Constantinus Magnus /  
D Theo-

Theodosius/vnd andere gewesen. Die zeit kan  
es nicht leiden / das wir dieser aller Exempel  
weitläufftig erzelen/ darumb wil ich ewer lieb  
in die Historien gewiesen haben/welche zeugt=  
nuß geben/das hochgedachten Regenten / die  
Kirche Gottes viel mehr zu hertzen gegangen/  
dann ihr eygen Leib vnnnd Leben / Kron vnd  
Scepter.

Darumb haben sie sich der Religion trew=  
lich angenommen/vnd wissen vnd nicht weh=  
nen wollen/was/nach der Propheten vnd A=  
postel wort / die rechte Lehr von Gottes we=  
sen vnd willen were / vnd wie man Gott zu=  
gefallen dienen / Christlich leben / vnnnd selig  
sterben könne / Darneben haben sie Abgötte=  
rey vnd falsche Lehr abgeschaffet / die reine  
Lehr / vnd rechte Gottes dienst auffgericht/  
nach der richtschnur der Prophetischen vnd  
Apostolischen Schrifften / die Kirchen wol  
bestellet / ihre Vnderthonen väterlich gemei=  
net / vnd Gericht vnd Gerechtigkeit geübet/  
Freyllich sind sie rechte Josie / vnnnd Gottes  
reuchwerck gewesen / die einem ganzen Lan=  
de / vnd Reich einen guten geruch gegeben/  
vnd die Vnderthonen gestercket / vnnnd er=  
quicket haben.

Also lesen wir in der heiligen Schrift/  
vnd Kirchen Historien/ auch von vilen Königin-  
nen/ Fürstinnen / Richterinnen/ vnnnd an-  
dern adelichen Frawen / wie sie sich der Kir-  
chen Gottes vnd Christlicher Religion ange-  
nommen/ viel gutes gestift/ viel böses verhüt-  
tet/ Land vnd Leuthen gedienet haben. Hat  
nicht die Gottselige Keyserin Esther Leib vnd  
Leben vber Gottes Volk gewaget? Do sie vn-  
erfordert / vnnnd ungefragt / wider Persisch  
Recht vnd gewonheit/ für iren König gehet/  
vnd redet den Juden das wort trewlich/ ver-  
hindert groß Blutnergiessen / vnd bringet  
Hamon/den vnwahrn Angiesser/an dē liech-  
ten Galgen. Placilla Keyser Theodosij des  
ersten Gemahlin/liget irem Herrn für vnd für  
in den ohren / das er ja bey der zu Nicea be-  
kandten Warheit bleibe/ vnd sich die Arziani-  
sche Schweger nicht verführen lasse / wie sie  
ihn auch endlich beredete / das er ein Concilium  
gehn Constantinopel beschriebe / darinnen die  
Arrianer / vnd Macedonianer sind vberwie-  
sen vnd eingetrieben worden.

Deßgleichen lesen wir von dem Gelehrten  
vnd Christlichen Frewlein Pulcheria / Key-  
ser Theodosij des andern Schwester/die war

an jres Herrn Brüdern Hoff. Der Münch so den Abbt regierte/vnd vermochte ihn/das er gehn Epheso ein grossen Caland verordnete/darin Nestorius mit seiner falschen Lehre ist widerlegt / verdamet / vnd der ganzen Christenheit hiemit wol gedienet worden.

Die kluge Fraw zu Abel war den Aufsehrern feindt / die sich wider ordentliche Obrigkeit aufflehneten / vñ sprach als eine Prophetin Gottes / Seba dem Sohn Bichri/ als dem Redelführer/seinen Kopff ab/vnd erretet mit jhrer klugheit die ganze Stadt / Also gab Gott heil/durch ein Gottselig Weib.

Die alte Königin zu Babel/da sie hörte/das jr Sohn König Belsazer/durch die hand Gottes erschreckt war / vñnd die Weysen in Babel kondten die heimliche schrift nicht lesen noch auflegen/gieng sie gen Hoff/vnd erwehnete des alten Propheten Daniels / des weisheit/trew/vñ wolthat schön am ganzen Hoff vergessen war/zum aller besten:bey dem / der den wahren Geist Gottes hat/sprach sie/wird man sich bescheidts vnd raths erholen können.

Die Welffin/ Fürstin zu Bayern/des berühmten Welffen Gemahlin/ist vmb jhrer tugend



gend vnd trew willen alles lobes werth/Dann  
do jr Herz in dem Städtlein Weinsperg / am  
Necker gelegen / nach vielen harten stürmen  
durch Schwerdt vnnnd Hunger bezwungen  
wurde / dem Keyser Conrad/auff gnad vnd  
vngnad/sich vnd die seinen zuergeben/vnd die  
Fürstin sampt den andern Edlen Frauen/  
bey dem frommen Keyser die genade außbrach=  
te / das man sie ohne schaden frey außgehen/  
vnd was ein jedere tragen köndte/mit ihr ne=  
men ließ. Do fassete die Welffin ihren Herrn  
auff den rücken : Dem Exempel volgeten die  
andern Adelichen Matronen / vnd trugen ire  
Männer sambt den Kindern zum Thor hin=  
auß. An dieser trewe vnd tugend/hatte der  
fromme Keyser ein sonderlich wolgefallen/vñ  
wurden also viel thewrer Helden erzettet/  
vnd in Schwaben vnd Bayern / durch einer  
Fürstin Klugheit / nach langem Kriege/wie=  
derumb friede vnd ruhe gestiftet.

Vnder diese vnd dergleichen Herrn vnnnd  
Frauen sollen vnd können wir vnser loblich=  
ste Obrigkeit auch billich rechnen. Dann wie  
väterlich vnnnd mütterlich / vnser gnedigste  
Herrschaft ihre liebe Vnderthonen / vnd son=  
derlich diese Stadt Amberg gemeinet / vnd  
noch meinen/das ist offenbar : Vnd wie man  
saget/das Werck lobet seinen Meister.

Ich sol aber jezund fürnemblich der in  
Gott verschiedenen vnser gnedigsten Fraw=  
en/vnd Churfürstin/lob mit warheit rhüm=  
lich preysen / nach dem Exempel vnserer Vor=  
fahren / Gott.vnd vnserer gnedigsten Obzig=  
keit zu ehin vnd danc̃sagung / auch zu gutem  
glimpff vnd namen vnserer Kirchen.

Es ist je Landkündig/vnd an jme selbstem  
warhafftig/dz höchstgedachte vnser gnedig=  
ste Churfürstin / mit denen Tugenden herrlich  
gezieret gewesen / welche S. Paulus in einer  
Christlichen Matronen erfordert/vnd haben  
wil/do er spricht : Ein Weib wird selig durch  
Kinder zeugen/ so sie bleibet im Glauben/vnd  
in der Lieb / vnnnd in der Heiligung sambt der  
Zucht. Dann was für ein brünst des Glau=  
bens der heilige Geist in jrer Churf. G. hertzen  
erwecket hat/ist darauß wol abzunehmen/das  
jre Churf. G. des Göttlichen Worts mit son=  
derbarn ernst/vnd fleiß sich angenommen/ vñ  
so weit kommen/das dieselb vnser Christliche  
Religion in allen Articulu recht vnd wol ver=  
standen / auch mit zeugnussen der heiligen  
Schrift beweysen/die Widersprecher eintrei=  
ben / vnd mit gelehrten Theologen sich darob  
in Tischreden vnd Collationen besprechen/ re=  
de vnd antwort geben können. Ich wil ge=  
schweygen vieler schönen einfallen / vnd re=  
den/

den/damit ihre Churf. G. manchen viel nach-  
denken / vnd zuschaffen gemacht. Dann die  
liebe Bibel/vñ zuuor auß der Psalter/ist ihrer  
Churf. G. ein liebes vñ wolbekandtes Hand-  
buch/vnd der höchste schatz auff Erden gewe-  
sen / darauß dieselb jren Christlichen Glauben  
jederzeit genehret/vnd vermehret hat.

Vnd wie ein rechter Glaub immer lebet/  
brennet / vñnd stönet / also hat sich auch des  
Glaubens brünst in vnser G. Frawen allezeit  
scheinbarlich ereuget / in dem sie täglich ihre  
Gebet / vñnd Lesestanden gehalten / vnd da-  
durch gewißlich viel grosser gefahr von diesen  
Landen abgewandt.

Dann ich bin gewiß / vñ kans mit der war-  
heit bezeugen/das ihre Churf. G. das abend  
vnd morgen Gebet / neben vorlesung etlicher  
Capittel in der Bibel embsig/vnd vnnachlessig  
alle tag verrichtet / vñ sich daran keine fürfal-  
lende gescheffte hindern/nach danon abhalten  
lassen/sondern jrer Churf. G. anfang vnd be-  
schluß des tags/ist das liebe Gebet / vñ lesung  
in heiliger Schrift gewesen / dardurch dann  
jrer Churf. G. die Bibel also bekandt worden/  
das dieselb in Collationen / wann ein Spruch  
vnrecht angezogen / oder damit verstoßen  
worden/ denselben alsbaldē Corregiren/Buch  
vnd Capittel/darinnen er zu finden/anzeygen  
kündten.

Zu

Zu deme haben auch vnder Tages ihre  
Churf. G. in heiliger Schrifft die meiste zeit  
zugebracht/vnd also Gottes Wort immer für  
augen / vnd die Bibel in den Händen gehabt.  
Eben wie das Fürstliche / vnnnd Gottselige  
Frewelcin Pulcheria/mit irem Herrn Bruder  
Keyser Theodosio/vnd desselben gelehrte Ge-  
mahlin/alle morgen ire Gebet öffentlich sol ge-  
sprochen / Psalmen gesungen / vnd etliche Ca-  
pittel in der Bibel gelesen haben / So ist auch  
vnuerborgen /das vnser G. Frawen sorg al-  
lein dahin gestanden/damit dero liebe Vnder-  
thonen/an der Seelen seligkeit nicht verhin-  
dert/nach verkürzet / Fried vnd Einigkeit in  
dieser Lands Kirchen gepflanget / vnd erhal-  
ten würde. Falscher Lehr ist ire Churf. G. von  
herzen feindt gewesen / vnnnd hat ob Gottes  
wahren Wort vnd ordnung stätt vnd fest ge-  
halten.

Ich bin glanbwirdig berichtet/wie beherzt  
ire Churf. G. manchmal dero geliebten Herrn  
vnd Gemahel/vnsern G. Churfürsten in für-  
fallender widerwertigkeit / oder böser bot-  
schafft zugeredet/vnd trost/vnd freude durch  
Gott eingesprochen hat / wie dann Gott dem  
weiblichen Geschlecht/eine sônderliche Rhetori-  
ca,freundliche stîmme vnnnd wunder schöne ap-  
plication eingepflanget/ welche das Herz rû-



ren vnd bewegen kan / wann zumahl solche  
Rethorica auß einem rechtschaffenen vnd Gott-  
glaubigen hertzen / darinnen kein falsch ist/  
quillet. Dergleichen gewisses wahrzeichen ei-  
nes freydigen Glaubens in vnser G. Frawen  
auch daran wol zu spüren gewesen / das dieselb  
ihren geliebten Herrn zu mehrmahln hertzlich  
getröstet/mit diesen worten: Mein Herz/halte  
nur fest ob der warheit vnd Gottes ordnung/  
vnd thue nicht wider Gewissen / ich wil mit  
ewer Geliebden ins bittere elend ziehen.

Zeiget doch die heilige Schrifft/das offt  
in Gottseligen Matronen ein sterckerer Glau-  
be sey/dann in den Mannen/Samsons Mut-  
ter/Manoë Weib / spricht ihrem Manne/ der  
vber dem wunder Gottes sterben wolte/Jud.  
13. tröstlich zu: Wenn der Herz lust hette vns  
zu tödten / so hette er das Brandopffer nicht  
genommen von vnsern händen / noch solches  
alles vns sehen vnd hören lassen. Nazianze-  
nus rhümet auch seine Mutter / wie sie so ge-  
lehrt vnd Gottselig gewesen/das sie seins Va-  
tern sinckenden Glauben mit ihren tröstlichen  
Sprüchen offtmals auffgerichtet/vnd gester-  
cket hab/vñ setz diß schöne Frawē lob darzu/  
das sie nicht allein daheim im Hauswesen/sei-  
nen lieben Vater viel sorge vnd vnmuth ge-  
stillet / sondern hab auch durch ihren weysen  
rath

rath zu gemeinen Friede vnnnd Ruhe gedie-  
net.

Nicht lang vor dieser zeit / sol ihre Churf.  
G. sich verhörn lassen / wan sie nur möchte ein  
stück solcher Concordien sehen / das die Chur-  
fürsten / Fürsten vnd Stende der Augspurgi-  
schen Confession verwandte / sich der Religi-  
on halben / zumal in strittigē Articuln / Christ-  
lich verglichen / vnd alle schädliche Spaltun-  
gen / zwischen dero Kirchen / nach Gottes  
wort gütlich entschieden / vnnnd auffgehoben  
wurden / so wolte ihre Churf. G. desto lieber  
sterben.

Do nun vnser Gott / nach seiner väterli-  
chen art / irer Churf. G. als seiner lieben See-  
len / auch ein schweres Creutz auffgeleget / vnd  
dero 4. schöne Herzlein vnd Fräwlein / welche  
doch alle zur Christlichen Tauff gebracht /  
jung weggenommen / vnd so viel Particul von  
irer Churf. G. hertzen gerieffen. Wie dann in  
dieser Kirchen Chor hochgedachte 4. Herzlein  
neben 2. Fräwlein sanfft ruhen / die andern 2.  
Frewlein aber sind zu Heydelberg begraben /  
So hat doch diselb solch hart Creutz / zu deme /  
das sie Gott selbst auch mit Leibes schwachheit  
beladen / in fraydigkeit ires glaubens mit groß-  
ser gedult getragen / vnnnd offtmals gesaget:  
Man

Man sol nur mit viel vmb jrer Churf. G. lang-  
ges leben beten / sondern für ihren geliebten  
Herrn / an deme mehr gelegen / Sie wolte mit  
Gott bald außspannen / vnd in die ewige hüt-  
ten auß dieser elenden Herberg einkeren.

Mit was herglicher trew ihre Churf. G.  
dero geliebten Herrn vnd Leibes fruchte ge-  
meinet / ist nicht außzusprechen. Dañ die sehn-  
liche bewegungen / welche Gott durch sein  
Wort vnd Geist in Christlicher Eheleuthe vñ  
Eltern hertzen gesprochen / vnd in adelichen  
Naturen grösser / vnd scheinbarlicher sein / las-  
sen sich mit Worten nicht erreichen.

Gewißlich ist auß höchstgedachten Fürst-  
lichen reden wol abzunemen / das jrer Churf.  
G. dero geliebten Herrn gesundheit vnd wol-  
fart / viel angelegner gewesen / dann dero ey-  
gene gesundheit / leib vnd leben / vnd wann es  
die noth erfordert hette / wurde jre Churf. G.  
der hochgelobten Welßin / oder andern Gott-  
seligen vnd eyferigen Matronen / nichts ha-  
ben zuuor gegeben / welche sich willig jrer Kö-  
niglichen Kron vnd ganzen Reichs verwe-  
gen / vnd hat mit ihrem Herrn das schwere  
Elend in Christlicher gedult gebawet.

Wiewol aber jre Churf. G. auß menschli-  
cher

cher schwachheit bißweilen / nach gelegenheit  
der sachen/beweget worden/wie dann groÿse  
Leuth ire sonderbare affecten haben/hat doch  
dieselb jr trewes hertz nie verwandt / sondern  
alles gut vnd wol gemeinet / vnnnd zur Süne  
vnd einigkeit trewlich gerathen / vnd wie die  
friedsame Abigail / vnnnd die kluge Fray von  
Thekoa viel vngenad / zorn/vñ mißuerstand/  
abgewendet.

Die Historienschreiber rhümen hoch/die  
Christliche Keyserin Placilla/ vnnnd die heilige  
Elisabeth / Landgraffen Ludwigs in Dürin=  
gen Gemahel / das sie groß Gelt auff die Ho=  
spitalen/vnd arme Leuth gewendt / die Kran=  
cken vnd kreistende Weiber selbst besucht/ vnd  
inen mit rath vñ that/ auß iren eygnen Kam=  
mern vnd Apoteccken/behüßlich gewesen. Wie  
dann Gott den Reichen seinen seggen reichlich  
gibet / das sie der Armen nicht vergessen sol=  
len.

Darumb auch vnser G. Churfürstin lob=  
seligster gedechtnuß alles rhumes diß falls  
gang würdig / dann wie gnedig vnd mild ihre  
Churf. G. in dero Lebzeiten / gegen Armen  
dürfftigen Leuthen sich erzeyget/vnd erwey=  
set/darvon werden auch in dieser Statt/son=  
derlich arme Leuth irer Churf. G. selbst zeng=  
nuß



nuss geben / vnd diesen tödtlichen abgang mit  
desto mehr zähern beweinen.

Wie auch dieses hoch zu preysen / wann ire  
Churf. G. armen Leuthen die hülffe gebotten/  
das dieselb solchs ganz still gehalten / vnd sich  
solcher miltigkeit gar nicht gerühmet / sondern  
viel mehr was dißfals gethan / vertruckt / vnd  
gerne gesehen / das / nach Christi worten / kein  
Mensch douon / noch die linck'e Hand gewust /  
was die Rechte gethon hette.

Es hat auch der trewe Gott / der nichts  
unbelohnet leß / irer Churf. G. Gottseligkeit /  
vnd milde hand widerumb reichlich bedacht /  
vnd der selben / vber andere zeitliche güter / vñ  
hohe gaben / eine liebliche / friedliche / vnd hold=  
selige Ehe / vnd in solcher Ehe mit dero aller  
liebsten Herrn vñnd Gemahl / fünff Herzelein /  
vnd sechs Frewlein lebendig bescheret. Vnd  
ob wol von demselbigen nur ein Herzelein / vnd  
zwey Frewlein vberstendig / so sind doch die  
andern vnuerlohn / sondern nur vorhin ge=  
sandt / dann ihre Seel hat Gott wolgefallen.  
Darumben hat er mit ihnen auß diesem leben  
der Sünder geeylet.

Am jüngsten Tag / wann der Herr Chri=  
stus alle milde gaben / so in seinem Namen auß=  
E iij gespen=

gespendet/öffentlich vor der ganzen Christen-  
heit wird lassen außruffen / vnd mit der Eh-  
ren Kron belohnen / als dann wird auch Oba-  
dia des frommen Priester Freundes trew/  
vnd Placilla / Pulcheria / Kunigundis / der  
hochgelobten Keyserinnen / wie auch vnserer  
G.Churfürstin / vnd dero Vhranfrawen S.  
Elisabeth Christeligster gedechtnuß / barm-  
herziges Hertz/vnd milde Hand rhümlich ge-  
preyset / vnd mit dem rechten Himmelbrod vnd  
wasser des Lebens/vber alles Gold vnd Sil-  
ber/so man hie zuno:gebenen Gottes diensten  
beschieden/reichlich vergolten werden.

Irer Churfürstlichen G.heilige zucht/vnd  
Keuscheit / ist weit vnd breit gerühmet / nicht  
weniger als dero Vhranfrawen / der heiligen  
Elisabeth / vnd Sant Kunigundis / Keyser  
Heinrichs/oder auch Richardis / Keyser Ca-  
roli Crassi hochlöblichster Gmahlin. Darumb  
auch ire Churf. G. keinem laster wider die an-  
dere Tafel so feind gewesen / als der vnzucht/  
Vnd hat vor keinen vberweyseten Ehebrecher  
bitten wollen/do doch sonst ire Churf. G.auß  
angebörner mitleidiger erbarmung/sich leicht-  
lich bewegen lassen / armer Sünder anzune-  
men / vnnd denselben nach gelegenheit der sa-  
chen ein gut wort zuuerleyhen.

Dann Zucht vnd Tugend ist/ auch bey den  
vernünfftigen Heyden/ alles lobs vnd rhums  
werth / vnd der schöneste schmuck an Weibes  
bildern/ der allen andern weiblichen tugenden  
die volge gibet. Daher ein Heidnischer Poet  
saget: Ein schönes Weib ohne zucht / sey wie  
ein schönes bild one haubt/ oder viel mehr/ wie  
Salomon saget: Wie eine Saw mit einem  
guldenen Harbandt: So kan/ one die keuscheit  
vnd heiligung/ Gott niemand warhafftig er=  
kennen vnd anruffen. Vnd wie die Schrift  
allerley Abgötterey dem Ehebruch vnd Hu=  
rerey vergleicht / Also hat widerumb Gott  
seine väterliche lieb gegen seinem eingebornen  
Sohne/ vnd dann auch gegen seines Sohnes  
Kirchen/ vñ dero gliedmassen/ in der keuschen  
Eheliebe vorgestellt.

Solchen glauben aber vnd hertzlich ver=  
trawen zu Gott / schnliche liebe / vnd trewe/  
keuscheit/ vnd zucht/ hat ihre Churf. G. durch  
krafft des heiligen Geistes / so in dero hertzen  
gewohnet/ gewircket / biß an dero seligst ende  
bewahret/ vñ bezeuget/ Do ire Churf. G. iren  
herzliebsten Herrn vnd Gemahel / mit deme  
dieselb in höchster trew 22. Jar ehelich zuge=  
bracht. Vnd dann auch ihret Churf. G. vor=  
nehmsten vnd vertrawesten Dienern / vñ  
Dienerin / so auff dero Leib gewartet/  
Christ-

Chrißlich getröſtet/ſehnlich geſegnet/trewlich  
vermanet/vnd nach langwiriger ſchwachheit/  
ſo diß Chrißliche vnd Fürſtliche Herz gar ge-  
ſchwechet/vnd abgemergelt/auff vorgehende  
Gottſelige bereitung/vnd andechtige begirige  
empfangung des warhaſtigen Leibes/vnnd  
Bluts vnſers Herrn IESV Chriſti/in be-  
ſtendiger bekantnuß des wahren Chrißlichen  
Glaubens/vnnd brünſtiger anruſſung des  
Göttlichen Namens/vnd herzlichlichen verlan-  
gen des ewigen Lebens/bey guter vernunfft/  
vnd mit redeten munde/ſanfft eingechlaſſen/  
vñ auß diſem Jamerthal in den ewigen freu-  
den Saal geſchieden/im 43. Jar ihrer Churf.  
G.alters.

Dann wie wir allhier durch Schriſſten  
von Heydelberg glaubwürdig berichtet/hat  
den 8. Martij ire Churf. G. zu nacht vber der  
Tafel/do dieſelb mit der jungen Herrſchafft  
allein Malzeit gehalten/ein froſt angeſtoſſen/  
darüber ſich ihre Churf. G. vber gewöhnliche  
weiß dermaſſen ſchwach gefület/das ſie wol  
empfunten/es wurde nicht recht thun/vnd  
derowegen zu ruhe begeret.

Volgends tages den 9. Martij hat ihre  
Churf. G. mit dero ganzen Frauenzimmer  
das heilige Abendmal des Herrn/mit hergli-  
cher



cher andacht vnd sehnlicher begierde empfangen/vnd sich alß bald dem lieben Gott gantzlich ergeben / nichts mehr geachtet / alles zeitlichen entschlagen / vnd jr Hertz vnd Augen allein zu dem ewigen gewendet / vñ sich zu einen Gottseligen ende geschicket.

Den 14. Martij des morgens nach 3. vhr / hat ihre Churf. G. dero hertzgeliebten Herrn vñnd Gemahel mit gar sehnlichen schmerzen gesegnet / das jederman gemeinet / sie würde alß bald verscheyden. Aber vber eine viertel stund ohn gefehr / haben ire Churf. G. auch dero ganges Frauenzimmer gesegnet / vnd einer jeden besonders die Hand gegeben / vñnd darauff vermanet / sie solten nider knien / vnd hertzlich beten / das Gott der Herr ire Churf. G. auch liesse / wie den alten Simeon in friede fahren. Diß hat gewehret biß nach 10. vhr / da ist ire Churf. G. gar seligklich in Christlichen hohen verstand eingeschlaffen mit diesem letzten wort / welches ihre Churf. G. deutlich vnd vornemblich auß dem abgrundt ihres glaubigen bergens gesprochen: Mein Geist frewet sich Gottes meines Heylands. In diesem ewigen Gott vnd Heyland / zu deme ire Churf. G. sich hertzlich ein lange zeit gesehnet / vnd offt gebetet / das sie möchte auffgelöset werden / vñ bey iren Herrn Christo sein / lebet nun ihre Churf.

G. in der ewigen ruhe vnd freud/bey dero allerliebsten Hertzlein vnnnd Fräwlein / so ihre Churf. G. vorhin gesandt/mit solcher herzigkeit gezieret. Darumb ire Churf. G. nicht mit der ganzen Welt/vnd aller irer herzigkeit vñ freude / nur auff ein augenblick / wechseln wurde.

Dann ein solch Hertz/vnd seliger Abschied kan je des ewigen Lebens nicht fehlen. Wir sein auch der tröstlichen zuversicht/ das dieses Fürstliche / Gottselige vnd trewe Mutterhertz/bey dem löblichen Hause der Pfalz bleiben/vnd auff desselben sehnliche Zweiglein erben werde / Dann es heist doch: *Natura sequitur semina quisque suæ*, das eingepfropffte Reiflein/schlecht seinen Stammen nach / vnd was von guter art / vnd adelichen Geblüt herkommet/ zu deme hat man sich alles guten zuversehen.

Derowegen dann/ zum sñderlichen rhum vnserer G. Churfürstin vñ Frawen/ auff anzeyg der Historien/insonderheit zuuermelden/ das vnserer G. Churfürstin vnnnd Fraw von der Ob vnd höchstgedachter heiligen Elisabeth/materna Origine, herühren sol/welche des hochberhümpten Königs Andriesen zu Vngern/so mit Keyser Friderich dem andern dieses namens/im Jar nach Christi geburt 1225.  
inß

inß gelobte Land gezogen/ Eheleibliche Toch-  
ter gewesen / hernach Landgraff Ludwig in  
Düringen vermäheliget / welcher eben in jetzt  
ermelten Zuge zu Brundus gestorben. Nach  
abgang aber ires Herrn / ist die heilige Elisa-  
beth Wittiben blieben / vñ hat zu Eysenach/  
Marburg/ vnd Naumburg/ ein heiliges leben  
geführt/ viel Almosen gestiftet/ selbst krancke  
vnd kreisende Weiber besucht / biß sie endlich  
zu Naumburg gestorben.

Diese Elisabeth hat ire Tochter Sophia/  
welche Landgraff Ludwig mit jr gezeuget/ ei-  
nem Hertzogen auß Brabant gegeben / vñnd  
von diesen 2. Ehegemahlen / löblicher vnd se-  
ligster gedechtnuß/ sol der Hessische Stam her-  
kommen.

Also müssen wir nun bekennen / das kein  
schatz auff Erden/ frommer Obrigkeit zuner-  
gleichen/ vñnd einem Land kein grösser leid wi-  
derfahm kan/ dann wann es solcher thewerer  
vñnd werthen gaben Gottes beraubet wird.  
Wiewol es gemeiniglich gehet/ nach der weis-  
sagung Salomonis: Böse/ böse/ spricht man/  
wenn mans hat/ aber wans weg ist / so rümet  
man es dann. Dañ menschlich Natur ist leyder  
also verderbet/ das sie der gegenwertigen ga-  
ben bald vberdrüssig wird. Vñnd so viel vom  
ersten.

Das

Das ander Stuck finden wir erst starck in  
vnsern Spruch / welcher vns berichtet/das  
Gott/wegen frommer Obrigkeit/die woluer=  
dienten straffen offtmals auffzeucht / welche  
nach derselben abgang/vber die Gottlose vnd  
vndandbare Welt / mit grosser gewalt ein=  
reissen/vnd/wie eine mechtige flut/Land vnd  
Leuth vberfallen. Denn also redet Esaias:  
Der Gerechte kommet vmb/das ist: Wann die  
böse Welt frome Obrigkeit wol geplagt hat/  
mit Muthwillen / Vngehorsam/ Widerspen=  
stigkeit/vnd andern lastern vnd schanden / so  
wird sie dann auß den Mittel geruckt vnuer=  
sehens / wie das Hebraisch wort Abad,hoc est  
subtrahitur eigentlich vermag.

Gleich wie der Erquater Enoch / der si=  
bende von Adam / auß der versamlung der  
Heiligen vor dem Altar/ hingezuckt / vnd mit  
Leib vnd Seel in das himblische Wesen verse=  
zet wurde/zum zeugnuß/das nach den sechs  
langen Tagen / das ist/nach 6000. Jarn/ das  
Wort ( vnd er starb ) nemlich der Todt/wür=  
de ganz vnd gar auffgehoben werden.

Vnd niemand ist/der es zu hertzen neme/  
spricht Esaias weiter / vund heilige Leuth so  
richtig vor sich gewandelt haben / vnd glau=  
ben/vñ gut gewissen bewahret / werden auff=  
geraf=



raffet für dem Vnglück / welches vber das  
Gottlose Wesen kommen sol / vnnnd niemand  
achtet darauff / Dann niemand achtet der ge=  
genwertigen gaben Gottes / vnd frommer U=  
brigkeit väterlicher / vnd mütterlicher vorsorg  
vnd trewe / weil man sie hat / man erkennet sie  
auch nicht ehe / vnser Gott rucke sie vns dann  
auß den augen. Sie kommen aber zum friede /  
vnd ruhen in jren Kammern.

Der heilige Geist führet seine sōnderliche  
sprach / vnnnd heisset sterben für dem vnglück  
weggerafft werden. Dann wann Gott böse  
Vnderthanen jrer sünden halben straffen wil /  
nimbt er fromme Regentn / vnd andere be=  
tende Christen zunor wegk / samblet vnd fle=  
het sie an ein sicher Ort / do inē kein leid wider=  
fahre / das heist zu friede kommen / vnd in der  
Kammer ruhen.

Es wolte mancher gern auff Erden einen  
ruhigen vnnnd friedlichen Ort haben / aber da  
wird nichts auß. So seind vnser Heuser vnd  
Kammern auff Erden nur gemietet / vnd wir  
wissen nicht / wann wir außziehen müssen.  
Aber die Kammer auff dem Gottes acker / vñ  
die stete im Himmel / so vns Christus bereitet  
hat / ist ruhelich vnd vnser eygen. Do kan vns  
keine angst / noth / sorg / krankheit / Welt / noch

Tenßet vnruheig machen / oder außtreiben.

Sie höret ewer Lieb/das auff Christlicher  
Obrigkeit abgang gefährliche veränderung/  
vnd gemeine plagen volgen.

Weil Daniel noch in Persien war/vnd Joseph in Egypten/Dauid vnd Salomon / Josaphat vñ Josias/1c.noch Könige/vñ Debora Richter in Juda vñ Israel warn/weil auch Carolus Magnus / Constantinus / beyde Theodosij/mit iren adelichen vnd Gottseligen Gemahlin vnnnd Schwestern/Placilla vnnnd Pulcheria/das Römische Reich regierten / do hatten die Vnderthanen noch gewissen schutz / denn die thewere Leuth/machten sich zur eyfern mawer / vnd hielten den zorn vnd straffe Gottes auff/durch ihr Gebet / vnd Gottselige vnd gerechte Regierung.

Gott ließ dem König Josia deutlich sagen/  
es solte bey seiner zeit Friede vnnnd Ruhe im Lande sein.

Josaphat tröstet er auch / vnd schützet in mit gewaltiger Handt / wider des Landes Feinde.

Constantino/dem Gottseligen Keyser/  
zeyget er am hellen Mittag ein fewrig Creuz  
am Himel/neben solcher schrift/in hoc signo vin-  
ces,

Theodosio müssen die Winde / wider des  
Reichs Rebellen/streiten helfen/ weil er den  
Herrn Christum/vnd sein Wort mit höchstem  
vleiß ehrete/vnd Abgötterey vnd alle Heidni-  
sche Grewel vnd Faßnacht mit grossem ernst  
abschaffete. Aber do diese Seulen vnd Pfey-  
ler moß worden / vnd brachen / do fieng sich  
alles Unglück an / wie die Geschichte in Persi-  
en/Egypten / Jüdischem Lande / vnd Röm-  
schen Reich all zuvil bezeugen / die sich nach  
höchstgedachter thewerer Regenten abgang  
zugetragen,

Do Joseph in Egypten starb / wurde sei-  
ner trew vnd wolthaten balde vergessen/ vnd  
die Kinder Israel mußten sich von Tyranni-  
schen Königen/65. Jar nach einander/grew-  
lich beschwern lassen.

Nach Daniels des Propheten Gottes ab-  
gang/welcher die grossen Babylonischen Kö-  
nige Nebucadnezar / vnd seinen Sohn Evil-  
merodach zu dem wahren Gott bekehrte/ vnd  
jr geheimbter Rath war/in weltlicher Regie-  
rung/

rung/name es mit den Babyloniern ein ende/  
vnd das Reich kame/nach König Belsazars  
todt auff die Meden/vnd Persen. Dann Cy-  
rus nam/noch bey Danielis Lebzeiten/Baby-  
lon ein / vnd vbergab hernach seinem Sohn  
Cambysi das Reich / der bezwang die Egyp-  
ter vollend vnder das Persische Joch.

Alßbald David vnd Salomon ire häub-  
ter gelegt/kam Rehabeam Salomons Sohn  
zum Regiment/der gab durch seine Tyranny  
ursach zur aussfhrur / darin sich das Jüdische  
Reich getrennet / vnd die zehen stämme Israel  
einen eygenen König auffgeworffen haben.  
Dieser Rieß hat einen vnwiderbringlichen  
schaden eingeführt.

Nach Debora absterben/ fielen die Midi-  
aniter vnd Amelekiter ins Jüdische Landt/  
wie eine menge Hewschrecken / vnd verheere-  
ten alles sibem ganzer Jar lang / das sich die  
Kinder Israel vor ihnen mußten in die höhlen  
vnd klüfften verstecken.

Josias der fromme König war kaum  
todt / da gabe Gott das Königreich Juda/  
ymb gewillicher Sünde vnd Abgötterey wil-  
len/in der Chaldeer hände/die verheeren auch  
das Land / vnd führen das Volck gefenslich  
gen Babel.



Da Josaphat entschlief / kame sein Gott=loser Sohn Joram ins Reich / der richtet Abgötterey an / vnd erwürgt seine Brüder / vnd viel Obristen in Israel. Bald fielen die Philister / vnd Araber ins Land / vnd verwüsteten / vnd plünderten alles.

Nach Constantini Todt / ist nicht lang friede im Römischen Reiche blieben / dann seine eygne Söhne sind selbst in einander gefallen / vnnnd hat einer den andern auffgerieben / Darneben sind in der Kirchen Gottes grosse Spaltungen / vnd streit eingerissen / vnnnd sind zugleich Synodi vnnnd Antisynodi gehalten worden.

Nach des ersten vnnnd andern Theodosij abschied / ist das Römisch Reich in Occident von den Gotten / Wenden / Hunnen / Rugianen / vnd Longobarden jämmerlich zerissen worden / biß endlich Mahomet vnd die Türcken mit inspiell kommen sein / vnd haben ganz Orient mit irem Sebel vnd Gottslesterung / biß auff diese zeit / erfüllet.

Summa es bezeugen doch alle Historien/  
G neben

neben täglicher erfahrung / das grosser Leuth  
abgang Critici sein / das ist / grosse verändere-  
rung / vnd gefährliche vnd beschwerliche zer-  
rüttung bedeuten / Wie auch der Heid Plato  
solches bezeuget: QVANDO REIPV-  
BLICAE IMPENDET MVTATI-  
O, DEVS BONOS VIROS EX  
EA AVOCAT.

Nun können wir mit warheit von vnse-  
rer gnedigsten Churfürstin vnd Landesmut-  
ter lobseligster gedechtnuß auch wol sagen/  
das ire Churf. G. mit dero Gebet vnd Christ-  
licher bescheidenheit / auff allen seiten vorge-  
bawet / damit nicht etwa ein sewer auffgieng/  
vnd grossen schaden thete / weil auß einem  
kleinen fündlein ein grosse brunst werden kan/  
die ein grossen Waldt verzehret.

Dann was in viel Jarn daher vor selga-  
me Practicken / vnd gefahr vorgelauffen / wis-  
sen verstendige / vnnnd in der Welt erfahrene  
Leuth am besten.

Aber vnser Gott / hat sonder zweiffel vn-  
ser gnedigste Herrschafft glaubige Seufftzer/  
neben

neben viel frommer Vnderthanen herzlichen  
Gebet / gnedig erhöret / vnnnd die gebundene  
woluerdiente Ruthen biß anhero auffgehal-  
ten. Was wir aber forthin nun zugewarten  
haben / gibt die zeit.

Unserer gnedigsten Churfürstin vnnnd  
Frawen ist zwar sehr wol geschehen / als die  
zu dero seligen Voreltern / Herzlein vnnnd  
Fräwlein versamlet / vnnnd ihrer Churf. G.  
Seele lebet bey Gott in einem ewigen Liecht /  
dero sorg / schwacheit / angst / schmerzen vnd  
todt hat eine endschafft / Irer Churf. G. Leib /  
der ein Tempel gewesen ist des heiligen Gei-  
stes / mit Christi Fleisch vnd Blut gespeysset  
vnd getrencket / ruhet sanfft in seinem Zim-  
mer.

Am jüngsten Tage wird der Herr Chri-  
stus auß den Stenblein / irer Churf. G. vor-  
wesenen Leibs / einen fernernewen / vnn-  
weslichen / krefftigen / herzlichen / vnsterbli-  
chen / vnd geistlichen Leib auffbauen / darin  
irer Churf. G. Seele widerumb wohnen / vnd  
vor dem angesicht der G. Dreyeinigkeit ewig  
leben sol. Dann so wenig die Schrift vnd vn-  
G ij ser

ser Glaube falsch sein kan / so wenig können  
wir an vnser G. Churfürstin / Frauen E-  
lisabethen Göttlicher/vnd ewiger Ruhe vnd  
Seligkeit zweiffeln / darinnen dieselb ihres  
Taufsnamens bedeutung völiglichen errei-  
chet.

Aber vns geschicht groß leid / so in dieser  
grewlichen Sodoma noch webern / die gar  
auff dem Kopff gehet / fluchet / schweret / zaub-  
bert / ist vngheorsam vnd Rebellisch / neydisch /  
vnd rachgirisch / voller bluts vnnnd mords /  
schlemiet vnd demiet / treibet vnzucht / hoffart /  
vbermuth vnd freuel ohne maß / geyt / wu-  
chert / scharret / treuget vnd leuget / schendet  
vnnnd lestert / veracht darzu Gott vnnnd sein  
Wort vnd Predigambt / Ist seinen Dienern  
aufffässig / vnd wil sich den geist Gottes nim-  
mer weysen vnd straffen lassen. Biß endlich  
der zorn Gottes anbrennen / vnd nicht mehr  
zu leschen sein wird.

Darzu müssen wir leyder sehen / das Gott  
viel frommer Danieles, Iosephos, Hiobos, Lothos, &c.  
Item Elisabethen / Placillen / Pulcherien / Do-  
rotheen / &c. jimmer nach einander von vns  
weg



weg raffet / welcher Gebet/Rath vnd Trost  
wir zu der bekümmlichen zeit am nötigsten  
bedörffen/weil alles Gottloß Wesen vnd Un-  
gerechtigkeit / sünde vnnnd schande zusehens  
vberhand nemen / vnd nicht mehr zu dempff-  
fen sein.

Derowegen / damit wir nun mit dem  
dritten Stuck beschliessen/sollen wir vber die-  
sen trawrigen vñ kläglichen fall vnserer trew-  
en Landßmutter auch trawren vnd klagen/  
vnd solch trawren vnd klagezeit nach Gottes  
Wort aufstellen vnd halten.

Fein vnd recht ist es/das Vnderthanen/  
nach tödtlichen abgang ierer wölthetigen/ vnd  
friedliebenden Herrschafft/auch mit eusserli-  
chen Ceremonien ihr hertzlich mitleiden vnd  
klage beweyßen / vnd in der Kirch die Altar/  
vñ Predigstul mit schwarzen Tuch bekleiden/  
eine Bahz setze/ wo es breuchlich/die Orgel ei-  
ne zeitlang einstellen / gemeine Gebet halten/  
in trawer Kleidern gehen/Wein vnd Bier ör-  
ten meyden/Trummel / Pfeiffen/ vnd allerley  
Seytenspill/vff Hochzeiten vñ sonsten / Item  
Denge vnd krenge / vnd das schreyen in Hen-  
G iij fern/

fern / vnd auff der Gassen abschaffen / vnnnd  
bey ernster Straffe verbieten / Dero gnedig=  
sten Obrigkeit zu vnderthenigsten gehorsam/  
vnd Christlichen mitleyden / auch Gott zuge=  
fallen / vnd dem Euangelio zu gutem nach=  
klang / Welches der Obrigkeit lob so hoch preys=  
set / wie dann auch im alten Testament solche  
Ceremonien vnd breuche üblich gewesen. Als  
man in des Erzuaters Jacobs / vnd der Kö=  
nige Josias vnnnd Sauls begengtnussen zu=  
sehen / inn welchen der öffentlichen Klag=  
zeit / Trawerliedern / Fasten / Klagzipffeln /  
Secken / vnnnd schwarzen Todentüchern /  
vnnnd das man Parfuß / mit verhülleten  
Mund zu Grab gangen / vnnnd sich in staub  
gesetzt / mit Aschen gestrewet / ic. gedacht wer=  
den.


Aber wann wir vnser Klagzeiten  
recht halten wollen / So müssen wir erslich  
die grossen Wolthaten erkennen / So wir  
bißhero von vnserer gnedigsten Herrschafft  
empfangen / vnder welcher wir eine lange  
zeit fein warm gessen / vnd dann auch vnse=  
rer gnedigsten Frawen / seligster gedechtnuß /  
Gottseligkeit / grosse Fürstliche Tugenden /  
vnd milde Handt / rühmlich preysen. Dar=  
nach

nach diesen erbärmlichen vnnnd vnzeitigen  
Rieß / So GOTT am löblichsten Hause  
der Pfaltz geschehen lassen / nicht in windt  
schlagen / wie die sichere / vnnnd vnbesunnene  
Welt thut / Sondern wol in acht vnnnd zu  
herzen nehmen / Vnnnd darauff Christliche  
Busse thun / vnser vielfaltige Sünde / groß-  
se Vndanckbarkeit / vnnnd alles mutwilliges  
vnnnd friedhessiges wesen / sampt den woluer-  
dienten straffen / erkennen / herzlich one falsch  
berewen / vnnnd GOTT vmb Genade vnnnd  
Verzeyhung / auch milderung aller straffen /  
im namen seines Sohns demütigst bitten /  
Vnd mit David immer seuffzen vnnnd spre-  
chen: Vmb meiner Brüder vnd Freunde wil-  
len / wil ich dir Friede wünschen / vmb des  
Hauses willen des Herrn vnser Gottes / wil  
ich dein bestes suchen. Auch mit vnsern gne-  
digsten Churfürsten vnd trewesten Landes-  
vater sehnlich mitleyden tragen / als deme  
freylich / zu dieser hochgefehllichen vnnnd be-  
trübten zeit / die beste Trösterin vnd getrew-  
este Gehülffin benommen / welche höchstge-  
dachten vnsern gnedigsten Herrn eine lange  
zeit lieblich / rätlich / vnd heilsam gewesen /  
manche freude erwecket / in schweren gedan-  
cken getröstet / vnd wider lustig gemacht hat /  
vnd

vnd aber ihre Churf. G. solcher freundselig-  
ster Colloquentin nun beraubet sein muß/  
dazu vber der selben abgang eine tieffe vnn-  
schmerzliche wunden empfangen / die so bald  
nicht heylen kan.

Da solten wir nun / wie vnserer höchsten vnd  
der ganzen Christenheit hohe noth erfordert/  
vnserer Herzen vnd Hände erheben / vnd Gott  
den Vater aller Gnaden vnd Trosts bitten/  
das er ein kresstigen vnnnd lebendigen trost in  
vnserer G. Churfürsten vnd Herrn betrübtes  
Hertz sprechen / ja sich selbst mit seinem tröstli-  
chen Geist darein trucken / vnd höchstgedach-  
ten vnsern gnedigsten Landfuater / sambt irer  
Churf. G. Herzlein vnnnd Frewlein in dero  
aufferlegten schweren Creutz auffrichten/  
stercken / regiern / erhalten / segnen / vnd wider  
alle Falschheit / Vntrew / vnnnd Feindschafft  
schützen / friedliche / glückliche / Gottselige / vnd  
langwirige Regierung vom Himmel herab  
verleihen / auch gute vnd trewe Râthe zu-  
geben / die Gottes ehre / vnd des Landes be-  
sten bedenden / suchen / vnd fördern / wie Jo-  
seph in Egypten / Daniel in Persien / vnd Naa-  
man in Syrien gethan. Damit wir arme Vn-  
dertho-

dertho-  
lichen  
pfalz  
gen ei  
in alle



alles  
eine  
Auf  
ches  
fern  
sten  
vnd  
all  
ne  
v  
sch  
se  
v



derthonen / vnder diesem schönen Churfürst-  
lichen Regiment baum der hochlöblichsten  
Pfaltz / vnd derselben blüenden Estlein / mö-  
gen ein gerühigliches vnd stilles Leben führen  
in aller Gottseligkeit / vnd Erbarkeit.



Er allmechtige GOTT / Va-  
ter vnser Herin IHSV  
CHRIST / sampt seinem  
Sohne / vnd heiligen Geist /  
verleyhe vnserer gnedigsten  
Churfürstin / vnnnd Frawen  
allezeit Christ vnnnd lobseligster gedechtnuß /  
eine selige ruhe / vnd freudenreiche / herliche  
Aufferstehung / vnnnd vns allen ein Christli-  
ches vnd vernünfftiges ende / vnd tröste vn-  
sern gnedigsten Thur vnnnd Landßfür-  
sten / sampt ihrer Churf. G. jungen Herlein /  
vnd Fräwlein / ja die ganze Christenheit / vnd  
alle betrübte Herzen / vnd lasse das licht sei-  
ner Warheit bey vns nicht verleschen / Gebe  
vns darneben ein frölich Hertz / in trübsal vnd  
schmach / vnnnd verleyhe inmer friede zu vn-  
sern zeiten / vnnnd sterwe allen Friedstörern /  
vnnnd lasse seine Genade allzeit bey vns sein /  
vnd

vnd erlöse vns/so lang wir leben/ Segne auch  
einen Erbaru Rath/ vnnnd ganze Gemein/  
Kirch/ Schull/ Hospital/ vnnnd Bergwerck/  
dieser löblichen Churstadt/vnd vnser aller be-  
ruff vnd nahrung.

**L**asset euch lieben Freund die Sach zu her-  
zen/ vnnnd das Gebete von hertzen gehen/  
Glaubt an den Herrn ewern Gott/ vnd vol-  
get seinen Propheten/ So werdet ihr sicher  
sein/vnnnd glück haben / Vnd spricht mit mir  
zum beschluß/ mit hertzlicher andacht/den 20.  
Psalm Davids / sampt einem glaubigen Va-  
ter vnser.

**D**ER HERR erhöre dich in der noth/ der  
Name des Gottes Jacob schütze dich.

Er sende dir hülffe vom Heiligtumb/ vnnnd  
stircke dich auß Zion.

Er gedенcke all deines Speisopffers / vnd  
dein Brandopffer müsse fett sein/ Sela.

Er gebe dir was dein Hertz begeret/ vnd erfülle  
alle deine anschleg.

Wir

Wir rhümen/das du vns hilffest/vnd im Na-  
men vnsers Gottes werffen wir Panter auff/ Der  
Herr gewehre dich aller deiner Bitte.

Nun merck ich/das der H E R R seinem Ge-  
salbten hilfft/ vnnnd erhöret ihn/ in seinem heiligen  
Himmel/ seine rechte Hande hilfft gewaltig-  
lich.

Jene verlassen sich auff Wagen vnnnd Rosse/  
Wir aber denken an den Namen des H E R-  
R E N vnsers G D E E S.

Sie sind nider gestürzet vnnnd gefallen/ Wir  
aber stehen auffgericht.

Hilff H E R R/ der König erhöre vns/ wenn  
wir rüffen.



Die Barmhertzigkeit GOTTES  
des Vaters/vnd der Friede vnfers Her-  
ren I H E S V C H R I S T I/sampt  
dem trost des heiligen Geistes sey mit  
vns allen.

AMEN.





SOLI DEO GLORIA.



Gedruckt zu Regensburg durch  
Johann Burger.

